

欽定剿平粵匪方略

欽定勦平粵匪方略卷六十四 癸丑年

十月初七日 戊寅 勝保奏言 臣於初四日由靜海

乘舟繞下西河連夜兼程前進初五日辰刻抵
津知奕紀帶兵一千八百名先期已到臣查逆
賊現因靜海被創意圖困守暗中盤踞獨流鎮
楊柳青一帶並於獨流鎮兩岸復紮木城以防
官兵截勦且知我兵在南欲乘閒窺伺天津兼

欲創隄北竄臣本欲駐紮王慶坨因其地屬僻
壤不便統籌全局遂分撥奕紀所帶熱河兵五
百名令總兵經文岱帶領前往在獨流後路相
機用舟紮營安設大礮堵勦臣一面飛調達洪
阿多爾濟那木凱馳赴天津會勦一面先儘臣
所帶官兵與奕紀之兵卽日統率前進總期早
得成功以紓

宸廔

勝保又奏言臣連日布置堵截該逆回竄之路
並派總兵經文岱帶兵由王家口繞赴天津調
取礮位船隻以作圍剿之用一面飛調多爾濟
那木凱馳赴揚芬港張莊一帶聽候調撥達洪
阿迅赴天津隨同合剿並調慶祺馳赴王家口
駐紮以扼其西竄文安大城之路惟慶祺尙知

其在河間多爾濟那木凱達洪阿臣竟不知其
在何路探聞達洪阿等爲人牽制是以不遵調
遣殊不知

國事至重少遲一日卽至失機況日久遷延豈不
誤事惟有仰懇

天恩迅飭由武清等處飛速前進在天津西北一帶聽
調

同日順天府奏言據武清縣知縣胡啟文詳稱
盤獲形跡可疑胡羣胡勝得弟兄二人當卽提
訊據供自幼使船爲生今年五月在臨清州地
方隨賊入夥現在賊人都在靜海縣地方頭目
王得等都往西南逃走訊明後卽行正法臣等
卽飛札所屬各州縣將該犯所供逆夥嚴密訪
拏務令全數弋獲應請

旨飭下僧格林沁等及直隸總督一體札飭軍營地方
文武員弁嚴拏務獲均奏入

上命軍機大臣傳諭勝保曰逆匪竄入靜海連次被創
仍盤踞獨流鎮楊柳青一帶勝保現在調撥各路官
兵擬與善祿西渡阿前後夾擊著卽激勵將士剋日
進剿務須偪入一處合力圍攻萬不可再令他竄達
洪阿多爾濟那木凱經該大臣調赴天津現在行抵

何處當此攻勦喫緊之際豈容任意延緩已諭知僧
格林沁嚴催前進並著該大臣再行飭催毋任遲誤
上又命軍機大臣傳諭僧格林沁曰勝保奏連日催兵
未到西北未能合圍覽奏曷勝焦急現在賊踞靜海
縣城亟須四面圍攻爲一鼓殲除之計昨有旨諭令
僧格林沁催多爾濟那木凱達洪阿帶兵前赴天津
聽候勝保調遣該員等帶兵行走何以如此遲緩當

此事機萬分喫緊之時豈無天良若是著僧格林沁傳旨飛催毋得再有遲延致干重咎並將該員等何日抵津迅速奏報又據順天府奏武清縣詳報盤獲逆匪胡羣等供出逆夥王得等均往西南逃去等語該大臣卽嚴飭軍營地方文武員弁一體嚴拏

同日李嘉端奏言據探九月十六日夜忽有賊匪至池郡城下焚燒東嶽廟經府縣督率兵勇

力戰不勝賊匪現踞府城其船數百隻皆泊南
門外尙未開行等語查郡城四面通江幾於日
驚風鶴前經臣咨商向榮撤回江西得勝之兵
安置彼處旣保池屬又可兼攻安慶雖准向榮
咨覆已飭音德布統帶川滇兵勇在蕪湖一帶
駐紮至今尙未到防而池郡已爲賊踞當再飛
咨向榮就近派兵前往克復奏入

上命軍機大臣傳諭向榮曰安徽池州府城四面通江據李嘉端奏稱咨商該大臣將江西撤回之兵安置池郡該大臣已飭音德布統帶川滇兵勇在蕪湖一帶駐紮至今尙未到防安省南北兩岸皆爲賊踞情形十分危急現在集賢關又已失守防堵綦嚴江北實屬無兵可撥該大臣統帶之兵屢經分撥亦覺稍單音德布帶領江西折回之兵能否迅速援應殊深

懸繫著卽權衡緩急酌撥將弁帶兵赴援萬不可任賊竄踞又致蔓延

同日陸應穀奏言據探江西賊匪竄擾湖北黃州漢陽相繼失陷武昌省城戒嚴臣查豫省南汝光一帶處處與楚北毗連信陽距武漢尤近兼之安徽廬州危急陳州歸德防堵亦甚緊要臣以一身支柱其間旣乏鎮將大員又無可調

之兵焦灼萬分因思陝甘督臣舒興阿帶兵二千八百餘名將次渡河仰懇

天恩俯念河南爲北路門戶情形緊急

飭下舒興阿於現帶陝甘兵內截留二千名交臣差遣
俾資守禦奏入

上命軍機大臣傳諭英桂曰現在逆匪竄擾湖北南汝光一帶處處與楚省毗連信陽距漢陽尤爲逼近安

徽集賢關已被賊擾歸德一帶防堵亦關緊要英桂
現已補授河南巡撫責無旁貸著卽兼程前赴楚豫
交界相機布置毋稍遲延並著將起程赴豫日期迅
速奏聞至黃河渡口各處均關緊要務須隨時與王
履謙長臻知照飭令地方官加意嚴防收集船隻盤
查奸細毋任賊匪乘閒偷渡

同日文謙特克慎張起鵬奏言賊匪自天津敗

竄靜海日在獨流楊柳青一帶往來窺探並聞
有由武清縣屬王慶坨等處旁竄淀河之意臣
等正議遣兵防剿適勝保已由靜海水路繞出
賊前於本月初五日馳抵天津卽日派委總兵
經文岱帶兵五百名馳赴王慶坨揚芬港等處
巡查堵剿防其旁竄勝保來津時因船隻短少
先帶來官兵五百名前經僧格林沁派奕紀帶

兵一千名復派熱河兵五百名古北口兵三百名均已先後到齊現議帶領兵勇於初六日起程前往楊柳青獨流一帶迎剿以期與靜海大兵合擊殲此羣醜奏入報

初八日 己卯 駱秉章鮑起豹奏言查賊船攻破田

家鎮上竄湖北省城南北兩省唇齒相依亟宜

調派兵勇前往援剿惟南昌被圍時經臣派撥
兵勇五千八百名飭委補用道夏廷樾等帶往
救援嗣聞江省圍解臣卽慮其上竄且南北兩
省陸路處處可通水路相距不及千里乘風駕
駛數日可到而岳州濱臨大湖爲湖南門戶水
陸交衝最爲緊要臣等現已陸續派撥兵勇一
千一百餘名分起前赴岳州交該府賈亨晉等

統帶就近察看地勢駐紮堵禦仍隨時察看如
兵力尙屬不敷或須豫調備撥臣卽就近飛咨
廣東雲貴等省選調弁兵來楚聽候調遣奏入
上諭曰楚南防堵情形尙可稍緩前已有旨令湖南撥
兵勇協濟湖北若湖北賊匪殲滅湖南自可無虞務
須不分畛域統籌大局不可祇顧一省

同日

上命軍機大臣傳諭僧格林沁曰昨據勝保奏催兵未到西北空虛當諭知僧格林沁飛咨多爾濟那木凱達洪阿迅速赴津會剿是否現已趕到與賊接仗此股賊匪必須及早併力合圍悉數殄滅若任其乘虛他竄剿辦更難得手著僧格林沁卽行嚴督官兵扼要截剿與勝保等四面兜擊此時事勢喫緊不可有一處稍鬆若何路再有竄逸朕必將何路帶兵官治

罪如多爾濟那木凱達洪阿沿途藉詞逗留貽誤卽著嚴行叅奏

同日刑部奏言本年九月初八日內閣奉

上諭訥爾經額統轄全省貽誤事機厥罪尤重著卽拏問由桂良派員解交刑部治罪等因茲於十月初七日經直隸委員將訥爾經額解送到部伏乞

欽派大臣會同臣部審訊奏入得

旨著派惠親王軍機大臣會同刑部審訊

初九日

庚辰

僧格林沁奏言准慶祺咨報於初七

日帶兵已進泊隔淀隄口門聞距獨流四五里有匪分踞卽令弁兵向前開礮進攻翻賊船二隻斃賊約有百名餘匪藏匿不出臣於初六日移營王慶坨飛札達洪阿迅速來營合力堵截適達洪阿已帶兵在獨流對直二十餘里之

藕柳村屯紮當卽知會勝保令其帶同奕紀兵
勇迅卽進剿惟大清河南岸皆水直通下西河
之萬店隄現已委員改裝易服前往查看並調
取天津船隻令由西沽前來大清河卽令達洪
阿在水路紮營橫截會剿

同日勝保奏言臣馳抵天津後探得該逆在獨
流鎮運河南北復紮木城又聞進踞楊柳青兩

岸用木板填塞巷口欲圖占踞因卽督帶官兵
五百名並奕紀所帶京營及古北口兵一千三
百名先行進剿惟馬隊俱在靜海水路不能調
來適副都統佟鑑管帶銅礮趕到並鹽政文謙
亦願帶勇協助臣於初七日卯刻督兵迎剿傳
令固原正定隊伍先行京營及天津壯勇隨後
接應甫至楊柳青地方卽見四處起火煙塵障

天船桅數十停泊河干賊衆搬運糧石上船臣
卽督令我兵分抄疾進並派奕紀帶勇督兵在
前飛催不准停足將其所築木壘兩段拆毀一
齊擁入街口該逆措手不及我兵槍礮齊施殺
死賊匪二百餘人落水淹斃者甚多生擒十餘
名並奪獲賊船十二隻起獲火藥糧米刀矛旗
幟器械等件該逆馬隊百餘名沿河向南先逃

時已薄暮卽在楊柳青街外紮營連夜飛調達
洪阿多爾濟那木凱前來會剿不知何時能到
復迎提臣所調靜海得力官兵令其飛由上西
河繞至以便星速前進或將獨流之賊先滅卽
可合兵靜海或靜海之賊先破卽可會剿獨流
總之以速爲妙均奏入

上命軍機大臣傳諭僧格林沁曰本日據勝保奏稱賊

匪由獨流偏近楊柳青該大臣不及待兵到齊先行
進剿獲勝現在紮營楊柳青街外飛調達洪阿等官
兵前進等語該逆復經痛剿退回獨流與靜海城內
之賊互爲援救非大兵迅速會集兜擊恐其窮極思
竄達洪阿旣已趕到著卽趨赴勝保大營聽候調度
萬不可令在遠處屯紮坐失機會其天津西北一帶
應如何分撥官兵扼要嚴防並著該大臣妥速布置

毋任逆匪乘虛他竄

上又命軍機大臣傳諭勝保曰逆匪由獨流竄擾楊柳青經我兵截剿賸有餘賊向南逃去自係竄至靜海獨流等處此次接仗該大臣督率奕紀文謙所帶兵勇赴剿各路會合之兵何以尙未趕到本日據僧格林沁奏慶祺已進泊隔淀隄口門距獨流四五里達洪阿現在獨流對直二十餘里之癩柳村地方屯紮

候船著該大臣飛速迎催督同進剿以便與靜海迪
南西凌阿善祿所帶之兵水陸夾擊此時逆匪在獨
流蟻聚必須合力兜圍殲除淨盡達洪阿所帶之兵
均係勁旅可期得力務卽迅提前進毋任延緩

同日台湧奏言臣接據張廷彪稟稱該員帶兵
行抵漢川逆匪已於十八日布滿漢陽漢口江
面阻塞不能前進並揚言有上竄荆襄之說臣

查漢川距省較近該處毗連孝感黃陂尙可繞道前進飭令趕到省垣伏思省垣根本重地又經賊匪竄擾自應馳往攻剿一面飛催頭二隊滿兵一面行調提標兵五百名派都司葉永泰管帶鄖陽鎮標兵八百名派遊擊翟萬林管帶馳赴安陸聽候調遣藉可遏賊北竄襄樊之路又接據協領秀岱稟稱賊匪已至沌口現欲上

竄荆郡等因查沌口係自湖出江口隘該處旣
被賊占勢難飛越而荆州喫緊更應豫爲準備
卽將由外江行走之三四隊官兵八百餘名飛
咨兩翼副都統星速截回會商分布荆州迤東
南北一帶擇要防堵復飛調宜昌鎮標兵五百
名馳赴荆州交署荆宜施道李卿穀會同兩翼
副都統督飭在城文武密布防守臣隨將到齊

之五隊滿兵四百餘名取道帶赴安陸府並檄
頭二隊滿營官兵八百餘名無論行抵何處卽
行折赴安陸臣到安後催齊提鄖二標兵一併
由安陸繞道帶往省城相機應援奏入

上命軍機大臣傳諭台湧曰賊匪逼近武昌該將軍帶
兵由安陸繞道前行以爲省城應援自應如此辦理
惟據奏賊船布滿江面並有上竄荆襄之說是荆襄

一帶情形亦甚喫緊著該將軍酌量緩急如能前往
武昌卽行赴援如江路梗阻不能卽抵省城可於江
北要隘地方遏賊北竄並嚴防荆襄等處勿令賊匪
乘虛紛竄

同日吳文鎔崇綸奏言查該逆於九月十八日
連檣直上省城迤北之塘角江面泊有逆船百
數十隻對江漢陽府城外及漢口鎮兩岸約共

有大小賊船六七百隻臣等明知城中兵勇不滿三千惟援兵旣猝不能至田家鎮散逃餘卒又一時招集不來卽署臬司唐樹義帶赴廣濟之二千兵勇江面爲賊船所阻亦急切不能趕回自以堅守待援爲是臣等登陴嚴守該逆於十九二十兩日將塘角所泊之船全行開至漢陽城外及漢口鎮兩岸停泊肆行焚掠火光徧

江晝夜不絕幸數日來自江西赴援興國州田
家鎮之兵勇陸續趕至省城者約二千餘名於
城上築口布置稍爲周帀急盼臬司江忠源收
集餘衆及署臬司唐樹義率帶征兵剋日旋省
以期紮營城外爲內外夾攻之計奏入

上命軍機大臣傳諭吳文鎔崇綸曰賊船乘風竄泊武
昌迤北之塘角江面旋駛往對江漢陽府城外及漢

口鎮兩岸肆行焚掠該督撫等現已入城堅守著卽督同在省文武將現到之兵勇妥爲布置臬司唐樹義前已帶兵行至黃陂本日復飛諭該員星速帶兵回省以資堵剿能否覓船徑渡並著吳文鎔等設法派員迎催前進其從前救援江西之湖南候補道夏廷樾所帶兵勇數千名尙未撤歸著該督等迅卽飛咨張芾飭令該道卽日帶兵赴援萬勿稍誤事機

上又命軍機大臣傳諭江忠源唐樹義曰該逆已將停泊省城塘角江面之船全行開至漢陽城外及漢口鎮兩岸計船約有六七百隻該督撫等登陴固守雖江西赴援兵勇到有二千餘名兵力尙單省垣危急唐樹義係本省臬司所帶各兵尙可得力卽著設法迅速繞赴省垣協同防守前經疊諭舒興阿帶兵由河南直赴楚境會剿不日卽可趕到江忠源現係安

徽巡撫皖省現在情形亦甚喫緊此時台湧若由荊
州帶兵已抵安陸則江北一帶有員駐紮尙可相
機策應著該撫斟酌緩急仍以速赴新任爲是皖省
自集賢關失守後安慶賊蹤已有北向廬州之意池
州又復被賊占踞朕心殊深懸繫諒該撫必能通籌
全局先其所急也

初十日辛巳慶祺奏言初六日晚行抵潯頭鎮距

獨流十八里南有長隄一道名曰隔淀隄沿隄
東行至壩臺之第八鋪地名獨流大橋有賊匪
掘開口門數處距獨流不過四里適中一小村
名曰第三府該逆分踞其間搶奪船隻擄掠婦
女居民均已逃散臣於初七日清晨進泊隔淀
隄口門卽令副都統松玉署遊擊冷慶帶領官
兵向第三府進攻該逆槍礮齊發我兵用連環

礮將第三府之賊擊落水中多名並擊翻賊船
二隻斃賊約百餘名賊退入獨流鎮內藏匿不
出是日申刻又復接仗我兵開礮轟斃賊匪數
十人內有穿黃衣者二人本日遙望豫河之內
往來檣帆不斷自係與楊柳青逆賊互相聯絡
並聞該逆仍有竄天津之意此時甫屆立冬河
未結凍急宜設法會剿臣已咨商僧格林沁勝

保文謙約定日期同時會剿使賊首尾不能相顧庶可聚而殲旃奏入報

聞

十一日
壬午和碩恭親王奕訢戶部尙書孫瑞珍

會同刑部奏言已革山西巡撫哈芬解送到部奉

旨令臣等會審臣奕訢並面奉

諭旨問哈芬接到解京旨意因何遲延到京與郭夢齡
因何意見不合曾寄信辦理捐輸因何欲歸行營辦
理臣等隨於初十日會同監提哈芬當堂訊問據哈
芬呈遞親供內稱曾親至太行山防剿賊匪不
敢覬覦及聞垣曲失守潞安等處有賊溷跡卽
帶兵沿途馳剿並無退縮不前情事此皆藩司
有心陷害陰謀肆毒至奉

上是之

勝保又奏言慶祺係奉

旨歸臣調度之員其現駐之隔淀隄地方亦係臣派令

諸勦並指示安營之所如有逆匪竄出用礮轟

擊迨初七日臣進兵攻擊楊柳青賊匪慶祺亦

斃賊多名並未咨報臣營先由僧格林沁具奏

查臣營與慶祺相距甚近並非聲氣難通臣奉

命責成辦理直省軍務統籌全局斷不敢稍涉偏私若
各存意見則軍心不能齊一於事無濟惟有仰
懇

聖恩訓飭諸臣總以

國事爲重使臣事權歸一不致掣肘庶可早滅妖
氛

臣等又奏言查初九日達洪阿帶兵七百餘名

來營據稱委係奉僧格林沁札調截留各處分
防往返奔馳兵疲馬乏此次前來亦非僧格林
沁本意達洪阿不敢有違

諭旨等語臣思該員既爲人牽制事出有因已囑令其
速調鍋帳馬匹前來以便隨同進剿奏入

上命軍機大臣傳諭勝保曰逆匪占踞靜海獨流二處
現經勝保派撥官兵募備船礮嚴密布置剋日圍攻

惟在帶兵各員聽受調遣合力兜擊自不難殄滅賊氛迅速藏事侍郎慶祺副統都達洪阿等均係歸勝保調度之員慶祺初七日擊賊情形何以並未咨報著該大臣嚴飭該侍郎務當協力同心毋得任意藐玩自干罪戾達洪阿疊次降旨催令赴勝保軍營至今始帶兵七百餘名到營實屬遲延此次姑免深究其未到之兵千餘名已諭僧格林沁嚴催前進仍著

勝保飛速調撥至多爾濟那木凱之兵應如何分撥
催調著該大臣斟酌辦理此股賊匪旣責成該大臣
勦辦一切調度朕斷不爲遙制若諸將觀望遷延任
意遲誤必致又蹈懷慶故轍畿輔重地豈容再有貽
誤儻有不遵調度致失期會者該大臣一面奏聞一
面卽以軍法從事

上又命軍機大臣傳諭僧格林沁曰該逆分踞靜海獨

流二處意欲分我兵力必須大兵雲集四面合攻方可一鼓殲除著該大臣將達洪阿未到之兵一千餘名飭令趕赴勝保軍營以備調撥毋再遲誤此時自以速殄逆匪爲要若前路進勦得手則後路防守自可無虞該大臣與勝保共辦一事務須仰體朕心合力同心肅清畿輔以副委任

同日奕經奏言查臧紆青所募壯勇俱隸徐屬

銅沛蕭礪等處一切技藝甚爲可觀茲奉

諭旨臧紆青以通判留於安徽補用該員仰沐

殊恩愈形感奮惟據稱自辛丑會試回籍後已閱十餘

年現尙有志觀光不敢驟邀官職言詞懇切可

否請

旨先行賞給通判虛銜仍留徐州管帶壯勇以資防禦

奏入

上諭內閣曰前有旨將舉人臧紆青以通判補用茲據
奕經奏稱該舉人願赴會試不敢遽邀官職臧紆青
著賞給同知銜仍令管帶壯勇以資防剿所有前次
賞給通判留於安徽補用之處著卽註銷

十三日

甲申

勝保奏言據探逆匪踞靜海城者不

過十之二三其賊目並賊衆馬匹船隻皆聚獨
流兩處深溝高壘暗埋地雷意欲牽阻我兵苟

延旦夕臣萬分憤激因抽調靜海軍營出仗得力之固原等兵一千餘名由下西河乘舟繞道前來並達洪阿帶到之兵七百名於十一日辰刻列隊前進直抵獨流賊巢該逆於土牆穴中施放槍礮意在固守不戰臣將調到天津之八千斤五千斤大礮架向木城轟擊逆匪遂分股傾巢撲出臣派天津正定官兵在西岸攻打前

敵令達洪阿帶兵接應天津固原河州西甯宣
化官兵在東岸攻擊奕紀帶兵接應臣居中親
督調度奮前衝殺西岸出賊二三百名卽爲達
洪阿等擊敗東岸賊匪擁出甚衆經各路官兵
槍礮齊施斃賊不下二百餘名賊見我兵並無
馬隊因從東面擁出馬隊數百衝入河州隊中
欲將天津各隊圍裹在內臣在東隄望見賊旗

甚近親帶吉林黑龍江馬隊二百餘名列成部
伍向東飛奔殺入河州天津各兵亦各奮力抄
擊槍斃穿黃馬褂賊目一名奕紀亦帶兵一齊
掩殺臣又飛調佟鑑所帶銅礮從旁轟擊賊衆
不能相顧紛紛傷斃落馬古北口提標兵目海
騰雲奮勇撲入林中先將乘黃轎之賊用槍擊
斃外委虎世德又槍斃黃轎中指揮逆衆之賊

目我兵齊將賊輜打碎但未知賊目爲誰乘勝
追殺直撲土壘統計傷斃賊匪五六百名該逆
屢經痛創自當膽落氣喪臣已飛調馬匹星夜
來營並商令西凌阿善祿在靜海盡力攻剿臣
擬移營逼近賊壘晝夜攻打儻能設法奪回獨
流使全股竄入靜海城中或靜海餘賊併入獨
流兩面夾擊以期剋日殲除奏入

上命軍機大臣傳諭勝保曰該大臣大營偏近獨流此次痛加勦洗賊膽已寒正當乘此機會盡力攻擊或先行收復獨流或分兵並取靜海該大臣相機調度卽行勦辦所有馬隊各官兵著卽飛催前進並督飭各路帶兵大員四面圍攻務將此股逆匪殲除淨盡如能將靜海城內股匪飭令西凌阿善祿與獨流官軍同時攻打俾該逆兩處不能互相救援勦辦更當

得手該大臣疊受朕恩與軍士誠意相孚定能計出萬全剋期奏捷慶祺經文岱所帶礮船應如何聯絡接應之處仍隨時酌量布置擊斃乘轎賊目係何姓名可於生擒賊匪內訊供具奏

上諭內閣曰此次進剿逆匪我兵馬匹尙未到齊當賊衆衝入河州隊中欲將天津各隊圍裏勢頗兇悍該大臣揮衆督戰各隊官兵人人用命奮力攻擊遂致

賊衆披靡殲戮甚多覽奏實深嘉慰著發去黑狐鞍馬褂一件珊瑚豆大荷包一對交勝保祇領該大臣卽督率達洪阿奕紀佟鑑及慶祺經文岱所帶官兵礮船四面兜圍將獨流逆匪悉數殲除並與西凌阿善祿等將靜海逆匪一律殄滅以靖畿疆

同日工部左侍郎呂賢基署安徽巡撫布政使劉裕鈐奏言本月初六日據張熙宇稟稱初三

日探得賊匪時在關內附近村莊擄掠財物並
高紮木臺宣講僞書等情張熙宇卽會商總兵
恆興等帶兵進關前往掩捕並飭前署懷遠縣
楊昌拔等隨後接應均於午刻到齊該匪見我
兵猝至舉旗招集城外賊匪約千餘人併力抵
禦經兵勇等擊斃百餘名該匪立時潰散我兵
分投追剿拏獲長髮賊七人斬殺數十人該匪

竄入城中閉門不出我兵卽將木臺燒燬於西
刻收復集賢關惟關南屋宇無存兵勇帳房又
復散失勢難駐紮臣等相度情形飭令分守冷
水鋪練潭等處節節布置以杜北竄之路查張
熙宇等前次接仗雖經退敗而此次鼓勵兵勇
收復集賢關頗爲迅速所有張熙宇恆興松安
楊昌拔等可否以功抵罪之處出自

天恩奏入

上諭曰張熙宇等此次尙屬出力然賊衆並未受懲
創仍著督催進剿若果倍加奮勉不但開復處分頂
戴猶應分別加恩是時若卽行開復未免過優

欽定剿平粵匪方略卷六十五 癸丑年

十月十四日 乙酉 吳文鎔崇綸奏言查賊匪自攻

破田家鎮大營後連陷蘄州黃州等府縣復竄
踞漢陽漢口省城防兵單弱無從追剿 臣等心
急如焚因臬司江忠源署臬司唐樹義已統大
兵返駐黃陂距漢陽僅八十餘里卽經疊飭該
司等星夜進兵急攻漢口漢陽兩處賊巢以恢

復重鎮爲保護省城之計茲據該司等稟稱探聞賊匪有分擾德安之信已撥兵一千往援該司等自應仍統大兵先攻漢陽埽蕩賊巢則省城轉危爲安迺計不出此竟統率全軍紆道前赴德安迎擊分股竄匪舍賊巢不剿置省垣不顧轉稱北顧爲重殊不知武漢之咽喉不通卽南北之血脈不貫長江劃斷天下事尙可言耶

相應請

旨飛飭江忠源唐樹義等迅掃漢陽賊巢藉保武昌危
城以免南北梗阻

同日陸應穀奏言據署南陽府知府顧嘉蘅等
先後稟報湖北賊匪於九月十八九等日由漢
陽分爲兩股一竄嘉魚之牌洲一竄蔡店窺伺
德安江面灣泊賊船約有二千餘隻現在圍攻

武昌文報不通並稱孝感已被占踞黃陂漢口
均有賊匪等語臣查信陽羅山距黃陂等處止
百數十里情形最爲喫緊統計前後調防官兵
僅八百餘名實形單薄現復札飭汝甯府知府
廖牲添派鄉勇五百名馳赴信陽羅山一帶扼
要駐紮令與官兵協力堵禦至南陽緊接湖北
襄陽近聞賊有欲擾荆襄之謠該處防堵亦極

緊要此時南陽鎮臣柏山已由固始帶兵折回
宛郡經臣咨會令與該府顧嘉蘅商酌籌辦自
可相機守禦均奏入

上命軍機大臣傳諭吳文鎔崇綸曰逆匪占踞漢陽江
面梗阻此時自應急攻漢陽以制賊勢江忠源現已
諭令暫留湖北督帶兵勇進剿漢陽賊匪並令唐樹
義設法渡江與該督撫等合力守禦台灣自荊州帶

兵赴援不知現抵何處前已疊降諭旨令舒興阿由河南馳入楚境督兵援應本日復催令前進計日當可趕到夏廷樾所帶兵勇數千已諭張芾飭催該員迅赴武昌曾國藩亦可由湖南帶勇赴援該督等嬰城固守惟有激勵將士兵勇盡力捍禦以待援兵

上又命軍機大臣傳諭英桂曰湖北逆匪由漢陽分爲兩股一竄嘉魚之牌洲一竄蔡店窺伺德安江面賊

船約二千餘隻孝感已被占踞黃陂漚口均有賊匪
河南信陽羅山距黃陂等處百餘里統計防兵僅八
百餘名兵力實形單弱已諭令舒興阿由河南帶兵
直赴楚境勦賊計由汴梁前進該撫此時已抵豫境
著卽馳赴楚豫交界爲舒興阿後路接應柏山已由
固始折回南陽並著該撫體察情形何處緊要相機
調撥毋令賊匪得以北竄

上又命軍機大臣傳諭舒興阿曰湖北賊匪探由漢陽
分爲兩股一竄嘉魚之牌洲一竄蔡店窺伺德安江
面賊船圍攻武昌情形危急須先將漢陽一帶賊匪
剿除方可杜北竄之路並可解省城之圍舒興阿計
已行抵汴梁著卽帶兵確探賊蹤迎頭截剿前在懷
慶留防之王定莖管帶官兵五百八十名卽著交舒
興阿軍營酌量調遣郝光甲所帶之兵前有旨令調

至該督軍營著卽飛速催調勿任遲延

上又命軍機大臣傳諭江忠源唐樹義曰前因安徽地方緊要諭令江忠源前赴新任現在安徽集賢關業已收復巢縣賊匪退去皖省情形較緩而楚北賊勢猖獗江忠源著暫留湖北統帶兵勇迅赴漢陽一帶直擣賊巢此時省城望援急迫若我兵攻克漢陽亦可牽制賊勢以解省圍唐樹義係本省臬司仍應設

法渡江與該督撫等併力守禦此時德安情形如不甚喫緊自應移兵先其所急舒興阿由河南帶兵入楚江北諸郡當可聲勢聯絡遏賊北竄總以統籌全局保衛省垣爲要

上又命軍機大臣傳諭張芾曰逆匪竄踞漢陽一帶武昌省城勢甚危急著張芾迅速飭令夏廷樾將前所帶兵勇盡數帶往應援武昌如該員業已啟行無論

行抵何處著卽飛催前進毋稍延誤

上又命軍機大臣傳諭劉裕鈐曰賊踞漢陽漢口省城困守勢甚危急已諭令江忠源暫留湖北督帶兵勇迅速援剿現在皖省防剿事宜著劉裕鈐會同呂賢基及署藩司袁甲三悉心籌畫嚴密布置萬勿稍有疏虞並著與奕經隨時知照總以力遏賊匪北竄爲

要

同日

上命軍機大臣傳諭奕經王履謙楊以增長臻英桂崇恩曰黃河爲南北要隘必應認真巡查著奕經王履謙楊以增長臻英桂崇恩督飭河工地方員弁實力巡查收集船隻勿令奸細溷跡偷渡沿河地方遼闊兵力或有不敷仍須勸諭近河地方紳民團練幫助官兵緝拏奸匪嚴查口岸船隻務使兵民聲勢聯絡

匪徒無隙可乘如有稽查不嚴致奸細偷越及逆匪搶渡之事必將該處地方文武卽行正法該侍郎督撫等尤當不分畛域一體稽查毋得稍有推諉

十五日

丙戌

勝保奏言十三日卯刻臣親督天津

正定河州宣化西甯各隊分三路齊進見逆衆盡在南面臣卽飛調天津河州隊伍繞至南隄與賊相對之處先行撲入由靜海調來托明阿

魁福馬隊卽令列於東南以備抄截我兵甫經
進攻賊礮密如雨下我兵亦奮勇回擊達洪阿
復帶領健銳火器兩營兵弁一齊上攻逆衆旗
倒馬奔屍相枕藉臣又令佟鑑用銅礮從東向
西橫擊經文岱松玉在下西河堵截亦帶礮船
接應同時夾攻鹽政文謙率領編修蕭培元等
督放大礮逆衆奔回木城緊閉柵門其未及奔

入之賊均被我兵擊斃奕紀在西岸先用擡槍
擊斃賊匪數十名復開放八千斤大礮轟燬賊
營望樓又用炸礮打入統計斃賊千有餘名惟
逆衆喪敗之餘窮極思竄西面湖水空闊一望
無際除慶祺駐兵防守外又經僧格林沁派兵
四百名前往協防臣復派副將邱聯恩帶兵二
百五十名並抽撥天津兵二百名駐紮防勦並

卷之二十三
咨令西凌阿善祿抽派

盛京官兵三百名往下西河空闊處所堵截計靜
海城中所存賊匪無多如能早日收復合兵進
攻獨流尤易得力奏入

上命軍機大臣傳諭勝保曰逆匪在獨流一帶負隅固
守此次又斃賊千有餘名賊勢日見窮蹙該大臣因
西面湖水空闊添兵扼堵又催西凌阿善祿進剿靜

海賊匪以分賊勢布置均合機宜惟賊情詭譎勢又
剽悍現既刻刻思竄難保不冒死狂奔務當嚴飭各
路將弁兵勇嚴密堵截毋稍疏虞靜海城中賊匪無
多卽飭令西凌阿善祿趕緊克復卽移營前進與獨
流官軍合力夾擊不可稍涉遷延致誤事機

上諭內閣曰逆匪竄踞獨流負隅死守經我兵三戰三
捷其勢已極窮蹙勝保調度有方各路帶兵大員及

將弁兵勇均能用命深堪嘉尙著發去金鞘牙柄小
刀十把銀鞘牙柄小刀十把銀鞘玉柄小刀十把小
荷包二百箇火鏹十三把著勝保擇其奮勇出力者
傳旨分別賞給並將疊次打仗出力之員弁兵勇查
明保奏候朕施恩該大臣務卽督飭各路官兵乘此
軍威迅殄羣醜毋令竄逸

同日江忠源奏言據探賊匪盤踞漢陽賊船由

漢水上駛有窺伺西北之勢旋接學臣青磨咨
稱賊從湏口雲夢水陸竄犯德安又聞漢川孝
感先後失守自當卽行馳救以遏北竄之路又
探賊匪有由武口分股竄擾黃陂之信卽撥兵
五百名留防黃陂將所餘兵丁千人派楊昌泗
管帶星夜馳赴德安臣卽隨後策應行至中途
探聞湏口雲夢之賊均已聞風竄回當派副將

駱永忠帶兵五百赴德安防守將楊昌泗所帶之兵調回以資攻剿旋接黃陂縣稟賊於九月二十七日竄犯該縣經張金甲帶兵督剿擊燬賊船二十八隻生擒賊匪十六名殺斃溺斃者甚多餘匪逃散臣等卽帶兵就近收復孝感擬卽馳赴漢川進攻漢陽旋聞漢川賊匪亦已聞風下竄因進至灡口紮營派員於牛湖搭造浮

橋進攻漢口十月初五日擊沈賊船三四隻奪
獲大船一隻殺斃賊匪十餘人沈溺無算因無
船隻不能追趕臣疊奉寄信

諭旨命臣馳赴皖省剿賊皆在臣奏報田鎮失事賊匪
上竄之前現在楚北賊勢方盛唐樹義帶兵無
多必須暫行幫同料理俟一二日營壘立定浮
橋造成進攻較有把握臣卽遵

旨前赴安徽奏入

上諭曰已有旨暫留汝在湖北勦賊茲覽汝奏適相符
合武漢最爲緊急設法分路勦洗兼杜北竄亦應防
其西竄該逆匪卽時北竄患雖速尙易爲力若任其
擾及秦蜀則大事無了局矣

上命軍機大臣傳諭駱秉章曾國藩曰湖北情形緊要
現已有旨令江忠源暫留勦賊著曾國藩將選募擬

赴江西之楚勇六千名迅卽酌配礮械籌雇船隻由該侍郎督帶駛出洞庭湖由大江迎頭截剿江面賊船肅清不特兩楚門戶藉可保衛並可杜賊紛竄豫省及秦蜀之路想曾國藩與江忠源必能統籌全局也所需軍餉仍著駱秉章迅卽設法籌備

十六日 丁亥 慶祺奏言臣於十月初十日接勝保

信約以槍礮聯絡之聲爲號合力進攻十一日

未刻聞獨流前面槍聲不絕知係勝保進兵攻擊臣卽於第三府地方先用五百斤銅礮直對獨流後面轟擊復連放五千斤洋礮直入獨流街內聞該逆營人聲驚嚷並見屋脊站立五人內有執大黃旗穿黃衣賊一人紅衣藍衣各二人均被轟倒是日午刻臣復令副都統松玉帶領官兵礮位前赴王家營督戰並僧格林沁派

到官兵四百名礮位十六尊合力攻勦該逆馬
步各隊由東隄紛紛南竄經該弁兵等開礮轟
斃數十人立即截回十二日松玉見該逆沿隄
竄至王家營勾家營五里鋪三處紮營盤踞卽
於午刻督率官兵奮力將王家營等處賊寨全
行踏平並斃賊五百餘名內有手執大黃旗身
穿黃衣者數人紅衣者十數人官軍直逼該逆

木壘詎賊由隄下潛出突放數槍適中松玉脣
上並擊落一齒統計三日進攻斃賊六七百名
溺斃者不計其數查點兵勇傷亡不過數人俟
查明再行分別賞卹奏入

上諭曰松玉進攻受有微傷實屬奮勇著賞給玉搬指
一件大荷包一對

十七日
戊子和碩惠親王軍機大臣刑部會奏言

臣等奉

旨會同定擬訥爾經額罪名查訥爾經額奉

旨督兵馳赴河南於懷慶解圍賊匪西竄後直隸與山西毗連各路要隘應如何周密布置乃於臨洺關遇賊竄出山口卽退守廣平毫無籌策以致賊匪紛竄畿疆誠如

諭旨畿輔重地較之他省更關緊要該革督統轄全省

貽誤事機厥咎尤重應請將訥爾經額比照守
邊將帥被賊攻圍城寨不行固守而輒棄去及
守備不設爲賊所掩襲因而失陷城寨者斬監
候律擬斬監候秋後處決仍恭候

欽定奏入

上諭內閣曰已革大學士直隸總督訥爾經額經朕特
授爲欽差大臣督兵馳赴河南剿辦逆匪自懷慶解

圍逆匪西竄後所有直隸與鄰省毗連各要隘宜如何嚴密防守乃於臨洺關遇賊竄至卽退守廣平毫無籌策以致逆匪紛擾畿疆該革督統轄全省貽誤事機實屬罪無可逭請爾經額著照惠親王等所擬按律定爲斬監候秋後處決

同日向榮奏言據探十月初四日有賊船三百餘隻由蕪湖江口竄入甯國府屬之灣沚擄掠

米糧臣恐其擾及東壩抄我後路致驚蘇杭且
慮東壩從前派去防堵之廣東兵八百名福建
兵五百名不敷堵禦不得已抽撥兵勇二千二
百名遴委總兵德安已革提督鄧紹良等統帶
於初七日馳赴東壩先扼要隘再相機迎剿務
須遏其竄往蘇杭之路大營亦可無後顧之虞
同日徐州鎮總兵百勝淮徐道王夢齡奏言侍

郎奕經奉

命督兵駐守徐州前因患瘡在營調理詎意病日增劇
至十月十二日未刻因病出缺徐州防勦事務
臣等與恩錫暫爲管理恭候

簡派大臣來徐督辦再隨員刑部員外郎恩錫是否回
京供職抑仍留徐州軍營仰懇

訓示遵行均奏八

上命軍機大臣傳諭向榮曰該大臣攻勦金陵賊匪半載有餘該逆屢次竄出擾及上游江西安徽各省是金陵城內賊匪所存無多疊經諭令向榮迅圖克復而江鎮兩城賊匪至今負隅師老則調遣愈難餉匱則轉輸不繼該大臣受朕厚恩膺茲重寄坐延時日能無愧心現在廣東撥解紅單船隻先後可以駛入長江前諭設法提赴上游遏賊江面往來之路或先

行收復鎮江翦其羽翼亦可以孤賊勢如果南岸得手則揚城股匪便無援應更易掃除此時趕緊進攻該大臣已不免糜餉老師之咎若再因循遲誤自問當得何罪近日直隸賊匪經勝保連次追剿旦夕可剿除淨盡若待勝保統兵南向直擣賊巢該大臣尙有何顏復見朕乎從前所降硃批及寄信諭旨均於責備之中寓成全之意原以該大臣老成宿將必能

爲朕分憂自桂林解圍以至武昌將該逆窮追南竄
該大臣與諸將士辛苦艱難朕夙夜在心特懸不次
之賞以待奏凱酬庸乃竟於抵金陵後一味遷延不
知朕宵旰焦勞之苦是向榮無福受朕恩眷言之殊
堪憤惜如能感激奮速行籌攻一有克復捷音爵
賞仍不難立予也據百勝等奏奕經因病出缺著向
榮於和春蘇布通阿二員內趕派一員馳赴徐州統

帶奕經所領之兵協力防守至賊船三百餘隻由蕪湖竄入灣沚擄掠米糧難保其不擾及東壩覬覦蘇杭著卽照議撥兵馳往扼守萬勿貽誤

上又命軍機大臣傳諭楊以增百勝王夢齡曰現在皖匪未盡徐宿總扼南北之衝情形緊要楊以增本有防河之責著卽就近兼顧徐州一帶稽查防堵事宜其調兵募勇一切均遵照前寄奕經諭旨並與百勝

王夢齡等體察地方情形相機辦理刑部員外郎恩錫係奕經隨帶之員著仍留徐州差委毋庸回京

上諭內閣曰刑部右侍郎奕經曾任尙書協辦大學士屢次獲咎經朕棄瑕錄用派令統帶官兵至徐宿一帶防剿斬獲首要匪犯多名一切布置尙合機宜前因患瘧賞假調理方冀速痊藉資倚畀遽聞溘逝軫惜殊深奕經著照侍郎軍營病故例賜卹任內一切

處分悉予開復應得卹典該衙門察例具奏

十八日己丑僧格林沁奏言查王慶坨楊芬港一

帶水路要隘均經分布官兵屯紮扼截並因獨
流正西之王家口鎮乃赴大城必由之路亦經
派撥官兵前往計逆匪占踞獨流靜海相距十
八里之遙首尾尙能相顧我兵雖連日進攻該
逆堅匿不出未必勢真窮蹙揆之逆情斷不肯

集賢堂 卷之三
久踞一隅臣所統勁旅又不能不儘數撥赴前
敵所餘之兵業經竭力分布現在水勢潏洄逆
匪設分股奔竄必能扼截惟瞬交大雪一經結
凍則頭頭是道設大股蠡擁豕突卽當分兵處
處攔截得力與否殊無把握惟有仰仗

天威俾前敵之軍乘時圍殄渠逆早奏膚公方稱萬全
同日勝保奏言臣自十三日攻剿獲勝後連日

進仗該逆但厚加土壘深挖濠溝並將兩次進
兵之處引水灌注泥深壘偏攻撲較難其靜海
南面雖西凌阿善祿疊次進攻該逆堅匿不出
尙未得手臣現將北路妥爲布置擬於日內親
提勁旅馳往靜海或商令達洪阿突出奇兵衝
過賊壘繞出靜海以北與西凌阿善祿併力夾
攻奪復靜海後合兵會剿獨流庶可剋期殄滅

集賢堂
三
至近日解來礮位轟擊甚爲得力稔知京師礮
營武城永固礮位及無敵礮重三千六百斤及
二千斤者命中致遠極爲便利可否請

旨飭下該營共撥運三四尊護送來營以資攻擊

勝保又奏言查十月十五日靜海逆匪在城上
開放槍礮西凌阿善祿督率兵勇亦開大礮回
擊轟毀城上木柵三處木城一座逆衆擁出兵

勇奮力齊撲傷斃逆匪多名該逆潛從南門撲
出千餘人經副將孔廣順等各帶兵勇四路夾
擊殲斃賊匪二三百名十七日派撥天津正定
西甯三營官兵並馬隊一百餘名至靜海城北
與西凌阿善祿合力夾攻該逆分三股蠶擁抄
出我兵奮力回擊斃賊不少統計此次斃賊五
六百名惟賊勢雖極窮蹙尙有五六百斤礮位

三四十尊擡槍鳥槍數百桿是以臣擬添調礮位盡力圍攻不使久延時日均奏入

上命軍機大臣傳諭僧格林沁曰據奏王慶坨等處要隘分兵屯紮並選擇官兵添赴前敵布置甚屬周妥本日據勝保奏稱現擬分兵先攻靜海等語逆匪分踞獨流靜海築壘挖濠負隅死守勝保擬攻靜海以分賊勢惟獨流係賊衆屯聚之所儻我軍向南攻勦

靜海而獨流之賊乘虛竄出不可不防該大臣駐紮
王慶坻應否移營前進兩軍聲息不通何能取勝須
與勝保隨時知照相機接應計出萬全不使賊匪竄
逸爲要

上又命軍機大臣傳諭勝保曰逆匪分踞獨流靜海往
來奔救該大臣擬先攻靜海翦賊羽翼亦出奇制勝
之一法惟北面最關緊要且由獨流至靜海更恐有

腹背受敵之虞該大臣務須籌畫萬全斷不可顧此失彼致墮奸計逆匪堅守木城礮攻未能得力是否可用土袋累成礮臺自高擊下或於獨流靜海之間橫紮營盤斷賊往來接應之路總宜隨地相機妥籌布置

同日晉康奏言查失守城池各員分賠銀米經費據戶部奏稱如果一年數月內全完應遣成

者應否免遣已到戍者應否釋回再行請

旨定奪等語在部臣曲爲矜全亦仰體

聖衷法外施仁之意惟守土者旣失城池所得罪名如

容贖免則廉而貧者抱向隅之戚貪而富者有

免戍之條凡不肖劣員孰不嚙比戶之膏血納

僚屬之苞苴以爲異日分賠倖免地乎賊匪越

兩湖至江南未經一戰所過地方如入無人之

境幸賴

天威震怒懲創數人始先後有汴梁懷慶之捷若藉分
賠爲名開倖免地步天下事更不堪設想矣奏
入

上諭內閣曰軍營賞罰必應嚴明守土各員果能如汴
梁懷慶之竭力守禦轉危爲安朕必優加懋賞若庸
劣之員平日旣漫無準備臨事復藉詞脫逃竟有棄

城不顧委銀米以資敵者喪心昧良實堪痛恨若復加之寬典何以整飭紀綱所有失守城池各員除將銀米勒賠外仍著各治以應得之罪毋稍寬縱